

Liewe Kärwegemenn!

Ich grüß äüch olle, wie ihr seid,

die grosse un die kleene Läüt.

Bei meim Gruß möcht ich niemand vorhäiwä,

ich gläb, des Joahr hot jeder sei bestes gäwä.

Die Kärwe, des is Tradition,

wärd gfeiert viele Jahre schon.

Dä Umzuch muss des Joahr leider aufalle,

Weil Corona betrifft uns halt olle.

Kee Musich, kenn Ausschank und a kee Asse,

die Festle des Joahr kannst de olle vergasse.

Souwas wie häüer hot niemand für möglich gholte,

Awer unner Kärwe müsse ma trotzdam irchendwie obholte.

Mir versammle uns häüt uff unnerm schöne Dorfplatz in Kambe,

dann kummt ihr amol uff onnere Gedanke.

De Abstand voneinander halte mir freilich ei,

nit dass ma anno ghässe werde, von der Polizei.

Letztes Joahr war die Begeisterung racht groß,

die näü gstaldete Kärwe, häüwe ma gfeiert famos.

In der Dorfmitte dut ma se seit ewiger Zeit wieder feier,

sou hot a keener mehr hinner Sportheim müsse eier.

Dä Zapfhahn wärd des Joahr wohl nid glüh,

zum ausgiebig feiere is es in Coronazeiten no zu früh.

Mir Kambma tun unner Bestes, um Traditione zu erhalte,
sou wurd freile a am 30te April schnall gschalte.

Als enigster in unnerer Nochbarschaft wurd unnern Maibaam
gestellt,

Von der Ortsmitte hot er fest gegrüßt Gott un die Welt.

In Kambe wärd in der Krise zammeghalte,
damit a nächstes Joahr wieder bleit alles beim alte.

Drum fräüt mich ah des Bild, wu ich do sah,
all die Kambma sän do mit Kind und Fraa.

Frust mit damm Wadder hör ich owel,
däs halt ich für ä dumms Gebobbel.

Denn jeder echte Kambma Hochbrunser,
der baat doch vor dä Kärwe sei Voterunser,
domits on unnerä Kärwezeit
nit anno än grossä Raache geid.

Nun, liewe Kärwegemänn,
jetzt wöllä mir nimma länger wort,
ich möcht äüch nun ä bor lustiche Gschichtä erzähl,
von unnerm Ort.

Unner Dorffest is die letzte Joahre immer schöner gworde,
zwä Doach lang offne die ihre Pforte.

Am zwätte Augustwucheend wärd des Fest für gewöhnlich
abholte,

un des Joahr hätts extra n spezielle Wei gawä, un zwar n racht
alte.

Vor 50 Joahr wurdn die Reben ohgebaut,
un des mol hot ma sich dodemit was getraut.

En extra Wei wurd aus dane Träuble produziert,
un am Weifest sölld er augschenkt werd, damit n a jeder probiert.

Das des Joahr was anners is, hot ma scho früh gemerkt,
weil unnern ohgstammte Festtermin war des Joahr begehrt.

Die Diedema sän an uns heran geträte,
un wöllde dass mir unner Fest verlege.

S Werdema Altstadtfest wurd um e Wuche nach hinne
verschouwe,

un Diede hätt do glei nachgezouche.

Ich muss soch, mir läücht des a gleich ei,
bevor mir nur zwä Festle verschiewe, verschiewe mir besser drei.

E Gutes konnt ma der Sache glei abgewinn,

De Jubiläumswei konnt scho drei Wuche früher durch unner Kehle
rinn.

Jetzt is es freile sou, die Uffregung hot sich nid gelohnt,

weil a des Festle wurd von Corona nid verschont.

Die Veranstaltung hot nid stattfunne,

drum hot a keener ä Loblied uff dann Wei gsunge.

Dähäm hot ma den dann aber a gern getrunke,

un ich gläb er wurd von allene für gut befunde.

Mir fräüe uns häüt scho uffs nächste Kambma Dorffest,

vielleicht dürfe mir do dann n näüe Jubiläumswei test.

Liewe Kärwegemenn,

Unnern Maibaam, ich höüws vord scho prophezeit,

is was ganz Bsonderes in der häüdiche Zeit.

Ä Zeiche für unner Miteinander stellt er do,

die Männer wu dann uffgestellt höüwe wurde no net oft genug gelobt.

Awa nid emol bei solchene Aktione läfft alles wie gschmiert, ich bericht äüch gern, wos do is alles passiert.

En Lockdown war verhängt, alle Gschäfte wore gschlosse, Keener durft sich mehr traff, höüwe se in Berlin beschlosse.

Sou n Baam unversehrt aus m Wald zu zieche, wie sölld ma des bloß alle hie grieche?

Zu zwätt sölld ma scho sei, damit sou ä Aktion a gelingt, un ma dänn Baam a sicher ins Dorf nei bringt.

Es hot sich a glei en Päärle zammegschlosse,

Nachts, damit se keener sieht, höüwe se sich getroffe.

Jetzt wars halt sou, se wore mit dam Gedanke nid alle, zwä onnere Trubbe hodde die gleiche Idee.

Drei Maibämm wäre für unnern Ort dann doch zu viel gewase, drum höüwe zwä Teams ihr Vorhawe no rachtzeitig wieder abgeblase.

Ich dank dane Kerle trotzdam, dass se nachts sän aus ihrm Haus, un mir werde jetzt sicher nid geize, mit unnerm Applaus.

Was würde mir nur mach, ohne unnere Fußballerkolleche,
a des Joahr sän se freile widder mitare Gschichte vertrete.
Die letzte Saison hot ma der Abstiech vermiede,
awa nur, weil der BFV sich gegen n Absteiger hot entschiede.
Vielleicht läffts ja besser in dare Runde,
seit letzter Wuche wärd scho widder gekämpft, um die nötiche
Punkte.
Fünf Wuche Vorbereitung höüwe se jetzt absolviert,
Dodebei wurd a des eh oder onnere im Training auprobiert.
Die erschde Runde im Pokal höüwe beide Mannschafte
gemeistert,
Über die nachfolgende Kontrahente wor awa anscheinend nid
jeder begeistert.
Der Gegner von der zwäte wor n Starke, der von der erschde n
Schwache,
für die Trainer wor des glei ä klare Sache.
Mir tausche unner Buwe für des ene Spiel,
beide Partie zu gewinne, wor dane ihr Ziel.
In Kambe wurd des Spiel von der Zwätte augetroche,
nur woare des die Jungs von der Erschde, wu do renne üwer de
Rase.
Der Trainer vom Gegner hot denn Brate glei geroche,
un wölld emol nochfröch, was die da eigentlich moche.
Efoch sou dausch, därf ma die Spieler fei nid,
bei äüch spiele a Spieler ohne Berechtigung mit.
S hilft jetzt nix, die Spieler sän uff de Platz gegange,

un höüwe a glei mim kicke ohgfange.

Daus die Verantwortliche höüwe ä efache Lösung beschlosse,
mir müsse nur uff unner Pokaltradition hoffe.

Früh sänn mir in de letzte Joahre immer augeschiede,
Mit dam Resultat wär dann bestimmt a der Gegner zufriede.

Ä Klache wär ma dodemit a augewiche,
un a die Presse wüsst üwer dann Fahler nix zu berichte.

Die Spieler höüwe des olles erschd hinnerher erfahre,
awa wie zu erwarte war do des Spiel a scho mit ens zu null
verlore.

Die Verantwortliche wösse s nächste Mol vielleicht vorher scho
Bescheid,

wenn nid, kummt ihr halt nächstes Joahr widder in die Predigt nei.

Joahr für Joahr sän mir Kambma uffs Näüe bemüht,
dass uff unnere Äcker a racht viel blüht.

Es wärd gepflonzt, gedüngt, gedudd un gemocht,
damit die Are do steht, in ihrer volle Procht.

Uff de Rache is in letzter Zeit kenn Verlass,
drum muss ma sich selbst kümmer, ums kostbare Nass.

E Führle Wasser die Wuche söllts scho mindestens sei,
manchmal werde s aber a zwä oder gar drei.

Für viele von unnere Spezialiste is des awa a kee Problem,
höüwe die meiste doch ihrn Bulldog in der Schäüer stehn.

Un Annaschd wie in Diede isses in Kambe ke Glücksspiel
Unner Wasser läfft vielleicht langsam, aber stabil.

Dunnaschdaoch middaoch hot sich en Kambma Pensionär die
Zeit genumme,

un sich zum Wasserhole uff sei Bulldöggle gschwunge.

Sein Bulldog fährt nid ganz sou schnall wie beim letzte Versuch,
egal, denkt er sich - sou n alte Däütz is halt a känn D-Zuch.

Wie uff Schiene wärd des Gespann nuff die Wasserstelle glenkt,
douwe ohkumme hot er a glei de Schlauch in seim Fassle
versenkt.

Er dröht s Hahnle uff un stellt sich uffs warte ei,

im nächste Moment plätscherts scho, des konn doch nid sei.

Sou schnall wie häüt is es aus dam Hahnle no nie gelaffe,

oder höü ich die letzte Fuhr Wasser üwerhaupt scho abgelosse?

Mim volle Fassle isses s Dorf nuff gfohre,

er guggt sich schnall um, des söllt besser keener erfahre.
Wenner do jetzt no ä värtel Stunn sitze bleid,
merkt vielleicht kenner, wosser do treibt,
un ganz nawebei, hält er ano de Fahrplan ei.
Sein Trick könne onnere sicher kopiere,
weil eichentlich würd er scho funktioniere.
Kemm is uffgfalle, was er do getriebe hot,
er is salwer Schuld, dass ich häüt üwer n spott.
S nächste Mal überlegste wamm du die Story verzählst,
un ob de dodefür grad de Schwocher vom Kärwepfarr auswählst.

Nun hört ihr lieve Läüt,
ich bitt nommol kurz, doss ihr uffmerksam seid.
Ich hoff, doss ich mit meinä Scherz,
niemond gekränkht höüw, in seim Herz.
Wenn ich jemond uff dä Schlips getraaträ bin,
donn is häüt Obend Beschwerdetermin.
Die Beschwerde müsst ihr nimmer damm TSV klochä,
sondern damm Bürgerverein vortrochä.
Die Tanja is die Chefin von damm Haufe,
ich hoff ja nit, doss se denn Erlös glei versaufe.
Die Kärwe wärd im Rothaus obkoltä,
wie ihr sahd, die Tradition bleid erholdä.
Beglückwünsch möcht ich häüt a no zwä besondere Gäst,
der ene häüt feiert sein Geburtstagsfest.
Der onner hots nach üwer 50 Joahr endlich gschafft,
un wurd nun offiziell zum Kambma Bürger gemacht.
Ihr zwä, ich sag jetzt scho mal Prost,
ihr wösst ja, mir trinke viel wenns nix kost!